


滿清二百
年來失地記



滿清二百年來失地記下卷

番禺陳沂春生著

第四章 南服之侵削

第一節 清紀元光緒二十年 滇緬邊境野人山 虎踞關以東 新街 孟
良土司大部分之喪失

緬甸昔屬於清。滇緬邊境。如滇省西南各邊。諸夷雜處。縱橫五七千里。原咸隸清國版圖。顧此等地方。歷朝控制之方畧。惟取蠲縻之策而已。明末以來。時有叛亂。乾隆朝。兩度出師征勦。遂臻平定。光緒中葉。中原多故。英人乘間與緬交通。傳教通商。日以多事。清國不及防維。始英師墟緬。雲南疆吏始遣都司袁善駐防騰越。爲騰越鎮朱鴻章擅殺之。再遣丁槐。則作隔岸觀火。於邊屬之本邦孟艮一帶。亦未劃清界線。遣兵駐守。因循觀望。致貽禍端。於是緬亡。而中國邊疆官慰宣撫地數千餘里。亦次第蠶食於強鄰。衛藏緬川。亦從此多事矣。英之

併緬係在光緒十一年冬間。英國由印度派兵出境。進據緬甸。滇省之迤南迤西。悉與毘鄰。野人山外地二千餘里。尋歸於英。孟艮 猛卯諸土司。警耗頻聞。清政府始有照會英國劃界之議。維時駐英清國公使曾紀澤。承准總理各國事務衙門密電。疊次與英外部會商。初議爲緬甸立君存祀。俾守十年一貢之例。旣不可得。始議定由英駐緬大員。按期遣使。賫獻儀物。其界務商務兩事。則擬先定分界。再籌通商。英人以驟闢緬甸全境。所獲已多。是以有稍讓清國展拓邊界之說。曾紀澤嘗向英外部理論。索八募之地。八募者。蠻墓（卽蠻耗）之新街也。昔時蠻墓土司之地頗大。且水陸輻湊。後悉爲緬甸所併（乾隆中葉以後。孟艮孟密本邦蠻耗諸大土司。悉爲緬甸所吞併）其商貨匯集之區。謂之新街。洋圖譯音則爲八募。距雲南騰越邊外百數十里。在大金沙江（又名厄勒瓦諦江。其上源發於印度西藏。貫野人山全地及緬甸全境。蜿蜒曲折五六千里。入於南海）上游之東。龍川江下游之北。檳榔江下游之南。向爲滇緬通商鉅鎮。新街孟艮之於雲南。如鳥之有雙翼。新街跨山爲險。屏衛其西。孟艮握江爲險。屏衛其南。皆

形勢必爭之地也。英人以該地爲緬甸精華所萃。斬而未許。迨爭論數次。英外部侍郎克蕾始云。英廷已飭駐緬英官。勘驗一地。以便允清國立準。且可在彼設關收稅。據清國使館洋參贊馬加理云。八募雖不可得。其東二三十里有舊八募城。似肯讓與清國。日後貿易。亦可臻繁盛。且允將大金沙江爲英清兩國公共之江。此江爲滇邊外絕大尾閭。如此則形勢與英同之。利益亦與英分之。似較得瑤東之地尤勝。曾紀澤以商辦已有端緒。因與英外務互書節畧存卷。暫停不議。交仰回華。光緒十二年六月。總理各國事務衙門。與英公使歐格訥議約五條。第一條。申明十年呈進方物之例。第三條中緬邊界應由清英兩國派員會同勘定。其後停頓五載。英人未嘗催問。清國亦暫置不理。大抵英人所稱願讓潞東地。南北將及千里。東西亦五六百里。至曾紀澤所索八募之地。雖爲英人所不肯舍。其曾經默許之舊八募。亦可爲通至大金沙江張本。查乾隆間。緬甸恃強陵侮清國。吞滅滇邊諸土司。騰越八關之外。形勢不全。西南一隅。本多不甚清晰之界。清人若不求展界。英人或反將勸入。故駐英清公使薛福成。以爲長江上源。爲小金

沙江最上之源。由藏入滇距邊甚近。洋圖卽謂之揚子江。清國若進分大金沙江之利。尙可使英人離邊稍遠。若仍守故界。則英人以江源伊邇。必通航徑入長江。以爭通商之利。且清國旣得大金沙江之利。則迤西一路之銅。可由大盈江以輪船遵海北上。取道大金沙江入海。一水可達天津。運費當省倍蓰。嘗與英外務力爭。於滇境西南兩面。均有展拓。至野人山地。（山中皆赤髮野人所居騰越諸種人中之至頑梗者也。各土司地。凡深山密箐中。皆有此種人。北起尖高山。南至火燄山。等練山。那欠山等。延長二千餘里。總稱之曰野人山。人口約四五十萬。貌醜惡如黑漆。性兇悍。以耕種游獵爲業。有寨落。出入必持利刀梭標長矛鳥槍。每伏要道。殺人行劫。）綿亘數千里。不在緬甸轄境之內。清人以爲照公法應由清英兩國均分其地。曾紀澤使英時。嘗有此意。而未申其說。及薛福成使英。因復照會英外部。索分八募以北大金沙江以東之地。請以大金沙江爲界。江東之境。均歸滇屬。屢以野人山爲甌脫地。與英相商。然大金沙江以東。苟有一甌脫。則足以阻隔印度。故英外部堅拒不應。兩次停商。數次翻議。英外部

所稍依允者。印度部復出撓之。（英國特設一管理印度部。以治理印度。使大臣掌之。不隸於殖民部大臣之下。）印度部所稍鬆勁者。印度總督復出而梗之。（印度總督之權甚大。儼然一國之君。與其他之總督不同。不過位於英王之下耳）印督甚至進兵蓋達邊外之昔馬。攻擊野人。以示不願分地之意。且野人山地。在大金沙江以西者。約四分之三。在大金沙江以東者。約四分之一。薛福成之意。欲以江爲界。則英清畛域。劃然中分。無如英人以翡翠玉石等礦。皆在此處。堅不肯舍。又查野人山地。爲騰越西北通西藏之要路。地形極險。上如登高。下如入井。自英人得緬甸。滇省藩籬已撤。惟有野人山之天險。隱然限隔中外。野人山爲英所有。則英可長驅而入雲南。有高屋建瓴之勢。而雲南更無可扼之險矣。是以英外部重視野人山地。不願分割。僅以一小部分讓回清國。又因永昌府及騰越鎮廳會銜所出之告示。措詞失當。遂執爲清國不管野人山地之鐵據。有就滇境東南讓清國稍展邊界之說。據稱已與印度總督商定。於孟定橄欖壩西南邊外。讓清人一地。曰科干。（又名葛干。又名開欽。）地在南丁河與潞江中

間。蓋孟艮土司舊壤。計七百五十英方里。又自孟卯土司邊外。包括漢龍關在內。作一直線。東抵潞江麻栗壩之對岸止。悉劃歸清國。約計八百英方里。又有車里孟連土司轄境甚廣。向隸雲南版圖。近有新設鎮邊一廳。係從孟連屬境分出。英人以兩土司昔嘗入貢於緬甸。并此一廳。爭爲兩屬。後亦願以全權讓清。訂立約章。永不過問。至滇西老界。與野人山地毘連之處。亦允清人酌量展出。其駐兵之昔董大寨。雖未肯讓還清國。而願以穆雷江北駐有英兵之昔馬歸清。南起坪隴峯。北抵薩伯坪峰。而逾南嶂而至新陌。計三百英方里。又自穆雷江以南。既陽江以東。有一地。約計七八十英方里。是野人山大地之讓還清國者。僅此彈丸黑子耳。其餘均依滇省原圖界線劃分焉。至騰越八關界址。尙未清晰。據雲貴總督王文韶云。漢龍關自前明已淪於緬甸。天馬關亦久爲野人所佔踞。則八關僅存六關。經薛福成再三力爭。英人始肯歸之清國。又英兵所駐之漢董。扼滇邊形勢。英外部亦願退讓。惟野人山地。則英人始終堅持。不允退步。光緒十九年。薛福成與英外部爭劃野人山地之時。英人動以野人兇悍。清國兵力不

能管理爲辭。且謂清國徒爭此地而不知管理。必致野人愈橫擾累英人。所以有萬難分劃之勢。據薛福成則謂野人頗知耕牧。亦通市易。其馴順之氣。實過於台灣之熟蕃。前歲遊歷道員姚文棟。道經此地。野人結隊送迎。環求歸屬清國者。到處皆是。此等野人。雖不隸鄰縣。然數百年來。中國以不治治之。而英人進兵野人山地。及滇省近邊。不過在光緒十六年以後。如野人山地歸還清國。則撫綏彈壓。清國任之云云。英人終不允退讓。其實野人山原係清國所屬各土司之分地。曾紀澤薛福成謂爲清英兩國甌脫地。殊屬非是。野人向認中國爲上邦。凡有事之秋。每請清國訓示。及請清國幫助。稽之志乘舊卷。訪之邊民口碑。知野人山實係清國所屬各土司之分地。卽明史所稱南牙山者。本在雲南界內。非甌脫比也。蓋乾隆時。滇緬老界。西包孟拱孟養蠻。南包孟艮木邦孟密六土司在內。其後六土司皆潛爲緬甸所有。清國不復過問。於是以現屬騰越之南甸隴川孟卯干崖蓋達等土司。現屬龍陵之遮放芒市等土司。及現屬普洱之車里十三猛土司爲新界。新界西至大金沙江而止。永昌騰越諸志。班班可考。野人山

蓋在新界之內也。查自騰越龍陵兩廳度野人山以通緬甸。其間共有九道。皆匯於新街。新街者。乾隆時蠻慕土司故地也。今新街既淪於英。又不能保守野人山九道。邊防無寸險之可扼矣。光緒十九年十二月。薛福成又疏稱。臣前與英廷訂明。將久淪於緬甸之漢龍天馬兩關。歸還中國。秋冬之間。仔細考察。始知鐵壁虎踞二關。亦早被英兵佔據。幸鐵壁關距邊密邇。臣屢向英外部爭論。彼始允令英兵卻退數里。讓還關址。以庫弄河爲界。惟虎踞關界限方向。初甚渺茫。久無定論。乃電請雲貴督臣王文韶。派員查閱。邀同八募英官履勘。英官並無異詞。印度總督。則謂該關深入彼境七八十里。已與八募相近。且隸緬已百餘年。一旦棄之。有損英國聲威。其意難於割地。遂并斬於讓關。臣又聞印度總督。以英外部允讓野人山內昔馬等地。意甚不平。聽信武員之說。屢思翻異。又欲借端停商前約。停商之後。彼知中國界址未定。漫無限制。仍可伺機進佔。再閱數年。非特昔馬等地。可以不讓。卽界線亦將如彼意重定。觀於前使臣曾紀澤商辦之時。迄今事隔八年。再與議約。難易損益。相去倍蓰。其明證也。臣再四思

維。決機宜早不宜遲。防患宜遠不宜邇。固不值以一隅而妨全局。亦未便爭小利而墮詭謀。度勢揆情。剛柔互用。甫在虎踞關以東劃定界線。雖未能復百餘年前舊地。然較之滇邊所守新界似已稍有展拓。此界務已定之大畧也。云云。查虎踞關以東之地。喪失不少。光緒十九年十二月。薛使與英外部酌定虎踞關以東界線。其片奏畧云。臣前向英廷索還漢龍天馬二關。繼查騰越八關。除太平江以北四關。確在老界之內。今既劃得昔馬等地。則四關更有外障。惟太平江以南四關。非特漢龍天馬。久淪異域。卽鐵壁虎踞二關。亦驟難審其實址所在。臣閱滇省所繪界圖。該二關皆在界線之內。意謂必無錯誤。遂告英外部。應照原界劃歸中國。英外部亦無駁辯。既而詳加考察。則虎踞鐵壁。早爲緬甸所佔。英人復屢加工程。綢繆穩固。英兵所守之界。越虎踞關而東者已數十里。越鐵壁關而東者亦六七里。英人覺之。爭論乃起。臣與儘力磋磨。始允將鐵壁一關。讓還中國。迫滇員尋覓虎踞天馬二關。勘得虎踞關在盆子西十里。距八募五十餘里。距南碗河邊英人所指爲中國邊界者八十里。天馬關則在西南。居猛密邦欠兩山

之間。英兵從關內山坡修路一條。以通緬屬之南坎。二關雖已久圯。關門營址尙存。詎印度總督不肯讓地。英外部從而附和之。據稱此關深入緬境。屬緬已百餘年。若中國索問此等舊地。則緬甸應索於中國者甚多。語意極爲堅勒。臣知英人不願我境逼近八募。英兵已多年扼守。欲令退讓。勢有所難。又思百餘年前。正值緬甸強橫之時。中國藩屬。如孟拱（地多玉石礦）孟養蠻暮木邦孟艮諸大土司。皆被吞併。則虎踞關之入緬當在斯時。今又與西洋強國爲鄰。臣愚以爲最要關鍵。莫若劃定界限。彼此截然不相踰越。若爭必不可得之地。久懸莫定。門戶洞開。安知今日所指爲我邊者。他日不復爲彼內地。愈佔愈進。後患笑竊。臣與訂明漢龍天馬。仍歸中國。惟漢龍關尙須查勘。如未深入緬境。自可通融讓還。虎踞關雖不可得。亦稍劃地以償中國。一曰龍川江中之大洲。得此則自猛卯通漢龍關。較形直捷。一曰蠻秀土司全地。得此則天馬關外。更依大山以爲固。似較近日滇邊所守之界。有展無蹙矣。云云又孟艮土司。地亦頗大。已分散爲十餘土司。皆在潞江以東。直與暹羅接界。英人以其屬緬已久不肯讓回清國。僅

讓回科干一地於清國。乃孟艮之迤北一隅耳。此外雖未至割地。而清國於其地仍無完全之主權者。尙有二地。其一爲孟連江洪二處。孟連江洪。非僅認清國爲上邦。實資清國爲治理。雲南回人未作亂以前。江洪孟連向屬清國。惟此管轄之權。因有亂事時暫爲停阻。該處之小事。清國雖聽宣慰司辦理。而其如何計地輸糧。係由滇督派員定奪。且徵收錢糧數目。會典所載甚明。是此地。顯爲清國之領土。乃滇緬條約訂明。倘未經通知英國。清國不能將孟連江洪讓與別國。是清國之於此二地。已失其完全之地主權矣。其一則爲南碗河之南。天馬關之北之大路。富清人向英人索還天馬關時。不知英兵已築新路。英人堅稱八募南坎往來之大路。斷難隔斷。歷年所用工程經費。斷難棄擲。且此時尙未竣工。緬官亦未肯罷役。時清人以關內而有英路一條。較形掣肘。又不能因此而遂不收回此關。後以南碗河之南天馬關之北。有一小地段。內有最捷之大路。可允英人在此行走。則所經中國之境較短。不如所修英路之長。而英國所築之路一條。即可永歸清國。然南碗河之南天馬關之北之大路。與英共之。是此地之主權。

已缺畧而不完矣。此滇緬劃界之大畧也。茲將清英二國所訂條約之關於界務者。節錄於左。

第一條 一今議定兩國邊界自北緯二十五度三十五分起。由格林尼址東經九十八度十四分。即北京西經一十八度十六分之尖高山起。隨山脊而行。向西南。過高崙坪及瓦崙山尖。由此過華昌村與高崙村之中間。以華昌村歸緬甸。高崙村歸中國。直至薩伯坪。自薩伯坪起。其綫向西而行。稍向南。過式脫崙坪。到納門格坪。由此仍向西南隨山脊而行。至大薩爾河。自此河源至此河與南太白江相會處。分尤克村在東。列棒村在西。自大薩爾河與太白江相會處起。界綫溯南太白江而行。至此江與雷格拉江相會。循雷格拉江上至其源。在尼克蘭相近。自雷格拉江發源處。分尼克蘭古庚昇格拉在西。昔馬及美利在東。其綫自來色江之西源起至此江與美利江相會處。復溯美利江上至其源。在赫畚辣希岡相近。分克同村在西。列塞村在東。界綫即循穆雷江向東南而行。至與旣陽江相會處。然後溯旣陽江上至其源。在愛路坪。然後由南奔江

(卽紅蚌河)西支源起。順南奔江而行。至流入太平江(卽大盈河一名檳榔江)之處。以上係首段之邊界綫。

第二條 第二段之邊界。由庫弄河(譯作葛龍江)與太平江相會處起。循庫弄河經過其西邊一條之支江。至其根源。自此向南而行。與洗帕河(下南太白江)相會。適在漢董之西南。以麻湯歸英國。壘弄格東鐵壁關漢董歸中國。至此溯洗帕河之支江而上。此江有根源最近孟定格江之根源。卽循山脊而行。向東南方。至南碗河邊靠南之克沱。以克沱歸中國。配侖歸英國。循南碗河向西南方而行。下至該河轉向東南處。約在北緯二十三度五十五分。其綫由此往南。稍向西。至南莫江。以南盡歸英國。循南莫江而行。至南莫江分開處。約在北緯二十三度四十七分。溯南邊一條之支江而行。至蠻透南邊高嶺之脊。約在北緯二十三度四十五分。卽循此嶺脊而行。此嶺脊係向東行。稍向北。至瑞麗江(卽龍川江)與南莫江相會處。以蠻秀地方及天馬關欣隆拱卯各村歸中國。此數處在以上高嶺之北首。卽溯瑞麗江而上。至此江分流處。再溯

南邊一條之支江而上。以江中大洲歸中國。至此江與孟卯相對東邊合流相近之處。如第三條所開 中國答允由八募至南坎各路中之最捷一條大路。經南碗河之南中國一小段地內。除中國商民與土人仍舊任意行走外。亦可聽英國辦事官員及商民游歷之人行走。並不阻止。英國如欲修理此路。或設法改築。可臻平穩。告知中國官後。便可動工辦理。又有須保護商賈或防偷漏等事。英國亦可籌備辦理。又議定英國之兵。可隨便經過此路。但如兵數過二百名者。若未經中國官答允。即不准過此路。所有帶軍器之兵。如在二十名以上。即須預先行文知照中國。

第三條 一第三段之邊界。自瑞麗江與孟卯相對東邊合流相近處起。照天然界限及本地情形。東前向麻栗壩而行。約到格林尼址東經九十八度零七分。北京西經十八度二十三分。北緯二十三度五十二分地方。有一大山嶺。自此循嶺脊而行。過來邦及來本隴。至薩爾溫江。（即潞江）約在北緯二十三度四十一分。此段由瑞麗江至薩爾溫江之邊界。應照第六條所開由勘界官劃

定。所有歸與中國之地。極少須與孟卯至麻栗壩作一直綫爲邊界所包括之地相等。倘查得合式可爲邊界之處。尙須加添少許之地歸中國。則中國應將別處邊界之地給還少許與英國。此事俟日後酌辦可也。自北緯二十三度四十一分起。邊界綫循薩爾溫江。至工隆北首之邊界。即循此工隆邊界向東留出工隆全地及工隆渡歸英國。科干歸中國。由此循英國所屬之瑣麥與中國所屬之孟定分界處之江而行。仍隨此兩地土人所熟識之界綫。至界綫離此江登山處。以薩爾溫江及湄江（卽瀾滄江）之支江水分流處爲界綫。約自格林尼址東經九十九度。北京西經十七度三十分。北緯廿三度廿分。約至格林尼址東經九十九度四十分。北京西經十六度五十分。北緯二十三度。將耿馬猛董猛角歸中國。在格林尼址東經九十九度四十分。北京西經十六度五十分北緯二十三度處。邊界綫卽上一高山嶺此山名公明山。循山嶺向南而行。約至格林尼址東經九十九度三十分。北京西經十七度。北緯二十二度三十分。以鎮邊廳地歸中國。然後其綫由山之西斜坡而下。至南卡江。卽順南卡江而行。約

過緯度十分之路。以孟連歸中國。孟倫歸英國。然後循孟連與康東之界綫。此界綫亦皆土人所熟悉。至北緯二十二度稍北處。卽離開南卡江。向東略南。循山脊而行。至南壘江。約在北緯二十一度四十五分。格林尼址東經一百度。北京西經十六度三十分。由此循康東及江洪之界綫。此界綫大半係順南壘江而行。惟除屬江洪一小帶之地。係在南壘江之西。北緯二十一度四十五分稍南。界綫行至江塢邊界後。約在北緯二十一度二十七分。格林尼址東經一百度十二分。北京西經十六度十八分。卽循江塢與江洪之界綫而至湄江。

第四條 一今議定北緯二十五度三十五分之北一段邊界。俟將查明該處情形稍詳。兩國再定界綫。

第五條 一現因中國不再索問永昌騰越邊界外之隙地。英國大君主於北丹尼。(卽木邦)地及科干。照以上所劃邊界讓與中國之外。又允將從前屬中國兼屬緬甸之孟連江洪。(卽車里)所有緬甸上邦之權。均歸中國大皇帝永遠管理。英國大君后於該地所有權利一切退讓。惟訂明一事。若未經大皇帝與